

《本草纲目》卷三十五上

《本草纲目》第三十五卷目录木部二

木之二乔木类五十一种

檨木《本经》，即黄柏  
檀桓《拾遗》  
小檨《唐本》  
黄栌《嘉祐》  
厚朴《本经》，浮烂罗勒附  
杜仲《本经》  
椿樗《唐本》  
漆《本经》  
梓《本经》  
楸《拾遗》  
桐《本经》  
梧桐《纲目》  
罌子桐《拾遗》，郢桐附  
海桐《开宝》，鸡桐附  
楝《本经》  
槐《本经》  
檀《拾遗》  
荚蒾《唐本》  
秦皮《本经》  
合欢《本经》  
皂荚《本经》，鬼皂荚附  
肥皂荚《纲目》  
无患子《开宝》  
栾华《本经》  
无食子《唐本》，即没食子  
诃黎勒《唐本》  
婆罗得《开宝》

榉 《别录》  
柳 《本经》  
怪柳 《开宝》  
水杨 《唐本》  
白杨 《唐本》  
扶移 《拾遗》  
松杨 《拾遗》  
榆 《本经》  
榔榆 《拾遗》  
芫荑 《本经》  
苏方木 《唐本》  
乌木 《纲目》  
桦木 《开宝》  
縠木 《拾遗》  
桐木 《拾遗》，即花桐  
棕桐 《嘉祐》  
磷木 《拾遗》  
柯树 《拾遗》  
乌柏木 《唐本》  
巴豆 《本经》  
大风子 《补遗》  
海红豆 《海药》  
相思子 《纲目》  
猪腰子 《纲目》  
石瓜 《纲目》

上附方旧一百三十五，新三百三十二。

《本草纲目》木部第三十五卷

木之二 乔木类五十一一种

檿木 《本经》上品

【释名】 黄柏《别录》、根名檀桓。〔时珍曰〕檿木名义未详。《本经》言檿木及根，不言檿皮，岂古时木与皮通用乎？俗作黄柏者，省写之谬也。

【集解】 〔别录曰〕檿木生汉中山谷及永昌。〔弘景曰〕今出邵陵者，轻薄色深为胜。出东山者，厚而色浅。其根于道家入木芝品，今人不知取服。又有一种小树，状如石榴，其皮黄而苦，俗呼为子檿，亦主口疮。又一种小树，多刺，皮亦黄色，亦主口疮。〔恭曰〕子檿亦名山石榴，子似女贞，皮白不黄，亦名小檿，所在有之。今云皮黄，谬矣。按今俗用子檿皆多刺小树，名刺檿，非小檿也。〔禹锡曰〕按《蜀本》《图经》云：黄柏树高数丈。叶似吴茱萸，亦如紫椿，经冬不凋。皮外白，里深黄色。其根结块，如松下茯苓。今所在有，本出房、商、合等州山谷中。皮紧、厚二三分、鲜黄者上。二月、五月采皮，日干。〔机曰〕房、商者，治里、治下用之；邵陵者，治表、治上用之。各适其宜尔。〔颂曰〕处处有之，以蜀中出者肉厚色深为佳。

【修治】 〔斆曰〕凡使檿皮，削去粗皮，用生蜜水浸半日，漉出晒干，用蜜涂，文武火炙，令蜜尽为度。每五两，用蜜三两。〔元素曰〕二制治上焦，单制治中焦，不制治下焦也。〔时珍曰〕黄柏性寒而沉，生用

则降实火，熟用则不伤胃，酒制则治上，盐制则治下，蜜制则治中。

**【气味】**苦，寒，无毒。〔元素曰〕性寒味苦，气味俱厚，沉而降，阴也。又云：苦厚微辛，阴中之阳。入足少阴经，为足太阳引经药。〔好古曰〕黄芩、栀子入肺，黄连入心，黄柏入肾，燥湿所归，各从其类也。故《活人书》四味解毒汤，乃上下内外通治之药。〔之才曰〕恶干漆，伏硫黄。

**【主治】**五脏肠胃中结热，黄疸肠痔，止泄痢，女子漏下赤白，阴伤蚀疮。《本经》。疗惊气在皮间，肌肤热赤起，目热赤痛，口疮。久服通神。《别录》。热疮疱起，虫疮血痢，止消渴，杀蛀虫。《藏器》。男子阴痿，及傅茎上疮，治下血如鸡鸭肝片。《甄权》。安心除劳，治骨蒸，洗肝明目，多泪，口干心热，杀疳虫，治蛔心痛，鼻衄，肠风下血，后急热肿痛。《大明》。泻膀胱相火，补肾水不足，坚肾壮骨髓，疗下焦虚，诸痿瘫痪，利下窍，除热。《元素》。泻伏火救肾水，治冲脉气逆，不渴而小便不通，诸疮痛不可忍。《李杲》。得知母，滋阴降火。得苍术，除湿清热，为治痿要药。得细辛，泻膀胱火，治口舌生疮。《震亨》。敷小儿头疮。《时珍》。

**【发明】**〔元素曰〕黄柏之用有六：泻膀胱龙火，一也；利小便结，二也；除下焦湿肿，三也；痢疾先见血，四也；脐中痛，五也；补肾不足，壮骨髓，六也。凡肾水膀胱不足，诸痿厥腰无力，于黄芪汤中加用，使两足膝中气力涌出，痿软即便去也，乃瘫痪必用之药。蜜炒研末，治口疮如神。故《雷公炮炙论》云：口疮舌坼，立愈黄酥。谓以酥炙根黄，含之也。〔杲曰〕黄柏、苍术，乃治痿要药。凡去下焦湿热作肿及痛，并膀胱有火邪，并小便不利及黄涩者，并用酒洗黄柏、知母为君，茯苓、泽泻为佐。凡小便不通而口渴者，邪热在气分，肺中伏热不能生水，是绝小便之源也。法当用气味俱薄、淡渗之药，猪苓、泽泻之类，泻肺火而清肺金，滋水之化源。若邪热在下焦血分，不渴而小便不通者，乃《素问》所谓无阴则阳无以生，无阳则阴无以化。膀胱者州都之官，津液藏焉，气化则能出矣。

法当用气味俱厚、阴中之阴药治之，黄柏、知母是也。长安王善夫病小便不通，渐成中满，腹坚如石，脚腿裂破出水，双睛凸出，饮食不下，痛苦不可名状。治满、利小便、渗泄之药服遍矣。予诊之曰：此乃奉养太过，膏粱积热，损伤肾水，致膀胱久而干涸，小便不化，火又逆上，而为呕哕，《难经》所谓关则不得小便，格则吐逆者。洁古老人言：热在下焦，但治下焦，其病必愈。遂处以北方寒水所化大苦寒之药，黄柏、知母各一两，酒洗焙碾，入桂一钱为引，熟水丸如芡子大。每服二百丸，沸汤下。少时如刀刺前阴火烧之状，溺如瀑泉涌出，床下成流，顾盼之间，肿胀消散。《内经》云：热者寒之。肾恶燥，急食辛以润之。以黄柏之苦寒泻热、补水润燥为君，知母之苦寒泻肾火为佐，肉桂辛热为使，寒因热用也。〔震亨曰〕黄柏走至阴，有泻火补阴之功，非阴中之火，不可用也。火有二：君火者，人火也，心火也，可以湿伏，可以水灭，可以直折，黄连之属可以制之；相火者，天火也，龙雷之火也，阴火也，不可以水湿折之，当从其性而伏之，惟黄柏之属可以降之。〔时珍曰〕古书言知母佐黄柏，滋阴降火，有金水相生之义。黄柏无知母，犹水母之无虾也。盖黄柏能制膀胱、命门阴中之火，知母能清肺金，滋肾水之化源。故洁古、东垣、丹溪皆以为滋阴降火要药，上古所未言也。盖气为阳，血为阴。邪火煎熬，则阴血渐涸，故阴虚火动之病须之。然必少壮气盛能食者，用之相宜。若中气不足而邪火炽甚者，久服则有寒中之变。近时虚损，及纵欲求嗣之人，用补阴药，往往以此二味为君，日日服饵。降令太过，脾胃受伤，真阳暗损，精气不暖，致生他病。盖不知此物苦寒而滑渗，且苦味久服，有反从火化之害。故叶氏《医学统旨》有“四物加知母、黄柏，久伤胃，不能生阴”之戒。

【附方】旧十二，新三十一。

1. 阴火为病 大补丸：用黄柏去皮，盐、酒炒褐为末，水丸梧子大。血虚，四物汤下；气虚，四君子汤下。《丹溪方》。
2. 男女诸虚 《孙氏集效方》坎离丸：治男子、妇人诸虚百损，小

便淋漓，遗精白浊等证。黄柏去皮切二斤，熟糯米一升，童子小便浸之，九浸九晒，蒸过晒研为末，酒煮面糊丸梧子大。每服一百丸，温酒送下。

3. 上盛下虚 水火偏盛，消中等证。黄柏一斤，分作四分，用醇酒、蜜汤、盐水、童尿浸洗，晒炒为末，以知母一斤，去毛切捣熬膏和丸梧子大。每服七十丸，白汤下。《活人心统》。

4. 四治坎离 诸丸方见草部苍术下。

5. 脏毒痔漏 下血不止。孙探玄《集效方》槩皮丸：用川黄柏皮刮净一斤，分作四分，三分用酒、醋、童尿各浸七日，洗晒焙，一分生炒黑色，为末，炼蜜丸梧子大。每空心温酒下五十丸。久服除根。杨诚《经验方》百补丸：专治诸虚赤白浊。用川槩皮刮净一斤，分作四分，用酒、蜜、人乳、糯米泔各浸透，炙干切研，廩米饭丸。如上法服。又陆一峰槩皮丸：黄柏一斤，分作四分，三分用醇酒、盐汤、童尿各浸二日，焙研，一分用酥炙研末，以猪脏一条去膜，入药在内扎，煮熟捣丸。如上法服之。

6. 下血数升：黄柏一两去皮，鸡子白涂炙为末，水丸绿豆大。每服七丸，温水下。名金虎丸。《普济方》。

7. 小儿下血 或血痢。黄柏半两，赤芍药四钱，为末，饭丸麻子大。每服一二十丸，食前米饮下。阎孝忠《集效方》。

8. 妊娠下痢 白色，昼夜三五十行。根黄厚者蜜炒令焦为末，大蒜煨熟，去皮捣烂，和丸梧子大。每空心，米饮下三五十丸，日三服。神妙不可述。《妇人良方》。

9. 小儿热泻：黄柏削皮，焙为末，用米汤和，丸粟米大。每服一二十丸，米汤下。《十全博救方》。

10. 赤白浊淫 及梦泄精滑。真珠粉丸：黄柏炒、真蛤粉各一斤，为末，每服一百丸，空心温酒下。黄柏苦而降火，蛤粉咸而补肾也。又方：加知母炒、牡蛎粉煨、山药炒，等分为末，糊丸梧子大。每服八十丸，盐汤下。《洁古家珍》。

11. 积热梦遗 心忪恍惚，膈中有热，宜清心丸主之。黄柏末一两，片脑一钱，炼蜜丸梧子大。每服十五丸，麦门冬汤下。此大智禅师方也。许学士《本事方》。

12. 消渴尿多 能食。黄柏一斤，水一升，煮三五沸，渴即饮之，恣饮，数日即止。韦宙《独行方》。

13. 呕血热极：黄柏蜜涂，炙干为末。麦门冬汤调服二钱，立瘥。《经验方》。

14. 时行赤目：黄柏去粗皮为末，湿纸包裹，黄泥固，煨干。每用一弹子大，纱帕包之，浸水一盞，饭上蒸熟，乘热熏洗，极效。此方有金木水火土，故名五行汤。一丸可用三二次。《龙木论》。

15. 婴儿赤目 在蓐内者。人乳浸黄柏汁点之。《小品方》。

16. 眼目昏暗：每旦含黄柏一片，吐津洗之。终身行之，永无目疾。《普济方》。

17. 卒喉痹痛：黄柏片含之。又以一斤，酒一斗，煮二沸，恣饮便愈。《肘后方》。

18. 咽喉卒肿 饮食不通。苦酒和黄柏末敷之，冷即易。《肘后方》。

19. 小儿重舌：黄柏浸苦竹沥点之。《千金方》。

20. 口舌生疮 《外台》用黄柏含之良。《深师》用蜜渍取汁，含之吐涎。寇氏《衍义》治心脾有热，舌颊生疮。蜜炙黄柏、青黛各一分，为末，入生龙脑一字。掺之吐涎。赴筵散：用黄柏、细辛等分为末，掺。或用黄柏、干姜等分，亦良。

21. 口疳臭烂 绿云散：用黄柏五钱，铜绿二钱，为末。掺之，漱去涎。《三因方》。

22. 鼻疳有虫：黄柏二两，冷水浸一宿，绞汁温服。《圣惠方》。

23. 鼻中生疮：黄柏、槟榔末，猪脂和敷。《普济方》。

24. 唇疮痛痒：黄柏末，以蔷薇根汁调涂，立效。《圣济录》。

25. 鬃毛毒疮 生头中，初生如蒲桃，痛甚。黄柏一两，乳香二钱半，

为末，槐花煎水调作饼，贴于疮口。《普济方》。

26. 小儿凶肿 生下即肿者。黄柏末水调，贴足心。《普济方》。

27. 伤寒遗毒 手足肿痛欲断。黄柏五斤，水三升煮，渍之。《肘后方》。

28. 痈疽乳发 初起者。黄柏末和鸡子白涂之，干即易。《梅师方》。

29. 痈疽肿毒 黄柏皮炒、川乌头炮等分，为末。唾调涂之，留头，频以米泔水润湿。《集简方》。

30. 小儿脐疮 不合者。黄柏末涂之。《子母秘录》。

31. 小儿脓疮 遍身不干。用黄柏末，入枯矾少许，掺之即愈。杨起《简便方》。

32. 男子阴疮 有二种：一者阴蚀作白，脓出；一者只生热疮。热疮用黄柏、黄芩等分煎汤，洗之。仍以黄柏、黄连作末，敷之。又法：黄柏煎汤洗之，涂以白蜜。《肘后方》。

33. 疔疮热疮：黄柏末一两，轻粉三钱，猪胆汁调，搽之。或只用蜜炙黄柏一味。

34. 火毒生疮 凡人冬月向火，火气入内，两股生疮，其汁淋漓。用黄柏末掺之，立愈。一妇病此，人无识者，有用此而愈。张杲《医说》。

35. 冻疮裂痛：乳汁调黄柏末，涂之。《儒门事亲》。

36. 自死肉毒 自死六畜有毒。以黄柏末，水服方寸匕。《肘后方》。

37. 敛疮生肌：黄柏末，面糊调涂，效。《宣明方》。

檀栢 《拾遗》

【集解】〔藏器曰〕檀栢乃百岁槩之根，如天门冬，长三四尺，别在一旁，小根缀之。一名檀栢芝。出《灵宝方》。〔时珍曰〕《本经》但言黄柏根名檀栢。陈氏所说乃槩旁所生檀栢芝也，与陶弘景所说同。

【气味】苦，寒，无毒。

【主治】心腹百病，安魂魄，不饥渴。久服，轻身延年通神。《本经》。长生神仙，去万病。为散，饮服方寸匕，尽一枚有验。《藏器》。

《唐本草》

【释名】 《弘景》、山石榴。〔时珍曰〕此与金樱子、杜鹃花并名山石榴，非一物也。

【集解】 〔弘景曰〕子檿树小，状如石榴，其皮黄而苦。又一种多刺，皮亦黄。并主口疮。〔恭曰〕小檿生山石间，所在皆有，襄阳岷山东者为良。一名山石榴，其树枝叶与石榴无别，但花异，子细黑圆如牛李子及女贞子尔。其树皮白，陶云皮黄，恐谬矣。今太常所贮，乃小树多刺而叶细者，名刺檿，非小檿也。〔藏器曰〕凡是檿木皆皮黄。今既不黄，非檿也。小檿如石榴，皮黄，子赤如枸杞子，两头尖，人锉枝以染黄。若云子黑而圆，恐是别物，非小檿也。〔时珍曰〕小檿山间时有之，小树也。其皮外白里黄，状如檿皮而薄小。

【气味】苦，大寒，无毒。

【主治】口疮疳??，杀诸虫，去心腹中热气。《唐本》。治血崩。《时珍》。《妇人良方》治血崩，阿茄陀丸方中用之。

黄栌 宋《嘉祐》

【集解】 〔藏器曰〕黄栌生商洛山谷，四川界甚有之。叶圆木黄，可染黄色。

木

【气味】苦，寒，无毒。

【主治】除烦热，解酒疸目黄，水煮服之。《藏器》。洗赤眼及汤火、漆疮。《时珍》。

【附方】新一。

大风癩疾：黄栌木五两，锉，用新汲水一斗浸二七日，焙研，苏方木五两，乌麻子一斗九蒸九暴，天麻二两，丁香、乳香各一两，为末。赤黍米一升淘净，用浸黄栌水煮米粥捣和，丸梧子大。每服二三十丸，食后浆水下，日二、夜一。《圣济总录》。

厚朴 《本经》中品

【释名】 烈朴《日华》、赤朴《别录》、厚皮同重皮《广雅》、树名榛《别录》、子名逐折《别录》。〔时珍曰〕其木质朴而皮厚，味辛烈而色紫赤，故有厚朴、烈、赤诸名。〔颂曰〕《广雅》谓之重皮，方书或作厚皮也。

【集解】 〔别录曰〕厚朴生交趾、冤句。三月、九月、十月采皮，阴干。〔弘景曰〕今出建平、宜都。极厚、肉紫色为好，壳薄而白者不佳。俗方多用，道家不须也。〔颂曰〕今洛阳、陕西、江淮、湖南、蜀川山谷往往有之，而以梓州、龙州者为上。木高三四丈，径一二尺。春生叶如榭叶，四季不凋。红花而青实。皮极鳞皱而厚，紫色多润者佳，薄而白者不堪。〔宗奭曰〕今伊阳县及商州亦有，但薄而色淡，不如梓州者厚而紫色有油。〔时珍曰〕朴树肤白肉紫，叶如槩叶。五六月开细花，结实如冬青子，生青熟赤，有核。七八月采之，味甘美。

皮

【修治】 〔斆曰〕凡使要紫色味辛者为好，刮去粗皮。入丸散，每一斤用酥四两炙熟用。若入汤饮，用自然姜汁八两炙尽为度。〔大明曰〕凡入药去粗皮，用姜汁炙，或浸炒用。〔宗奭曰〕味苦。不以姜制，则棘人喉舌。

【气味】 苦、温、无毒。〔别录曰〕大温。〔吴普曰〕神农、岐伯、雷公：苦，无毒。李当之：小温。〔权曰〕苦、辛，大热。〔元素曰〕气温，味苦、辛。气味俱厚，体重浊而微降，阴中阳也。〔杲曰〕可升可降。〔之才曰〕干姜为之使。恶泽泻、硝石、寒水石。忌豆，食之动气。

【主治】 中风伤寒，头痛寒热惊悸，气血痹，死肌，去三虫。《本经》。温中益气，消痰下气，疗霍乱及腹痛胀满，胃中冷逆，胸中呕不止，泄痢淋漓，除惊，去留热心烦满，厚肠胃。《别录》。健脾，治反胃，霍乱转筋，冷热气，泻膀胱及五脏一切气，妇人产前产后腹脏不安，杀肠中虫，明耳目，调关节。《大明》。治积年冷气，腹内雷鸣虚吼，宿食不

而尿白。主肺气胀满，膨而喘咳。《好古》。

【发明】〔宗奭曰〕厚朴，平胃散中用，最调中，至今此药盛行，既能温脾胃，又能走冷气，为世所须也。〔元素曰〕厚朴之用有三：平胃，一也；去腹胀，二也；孕妇忌之，三也。虽除腹胀，若虚弱人，宜斟酌用之，误服脱人元气。惟寒胀大热药中兼用，乃结者散之之神药也。

〔震亨曰〕厚朴属土，有火。其气温，能泻胃中之实也，平胃散用之。佐以苍术，正为泻胃中之湿，平胃土之太过，以致于中和而已，非谓温补脾胃也。习以成俗，皆谓之补，哀哉！其治腹胀者，因其味辛以提其滞气，滞行则宜去之。若气实人，误服参、芪药多补气，胀闷或作喘，宜此泻之。

〔好古曰〕《本草》言厚朴治中风伤寒头痛，温中益气，消痰下气，厚肠胃，去腹满，果泄气乎？果益气乎？盖与枳实、大黄同用，则能泄实满，所谓消痰下气是也。若与橘皮、苍术同用，则能除湿满，所谓温中益气是也。与解利药同用，则治伤寒头痛；与泻痢药同用，则厚肠胃。大抵其性味苦温，用苦则泄，用温则补也。故成无己云：厚朴之苦，以泄腹满。

〔杲曰〕苦能下气，故泄实满；温能益气，故散湿满。

【附方】旧七，新七。

1. 厚朴煎丸 孙兆云：补肾不如补脾。脾胃气壮，则能饮食。饮食既进，则益营卫，养精血，滋骨髓。是以《素问》云：精不足者补之以味，形不足者补之以气。此药大补脾胃虚损，温中降气，化痰进食，去冷饮、呕吐、泄泻等证。用厚朴去皮锉片，用生姜二斤连皮切片，以水五升同煮干，去姜，焙朴。以干姜四两，甘草二两，再同厚朴以水五升煮干，去草，焙姜、朴为末。用枣肉、生姜同煮熟，去姜，捣枣和丸梧子大。每服五十丸，米饮下。一方加熟附子。王璆《百一选方》。

2. 痰壅呕逆 心胸满闷，不下饮食。厚朴一两，姜汁炙黄为末。非时米饮调下二钱匕。《圣惠方》。

3. 腹胀脉数 厚朴三物汤：用厚朴半斤，枳实五枚，以水一斗二升，

温服一升。转动更服，不动勿服。

张仲景《金匱要略》。

腹痛胀满 厚朴七物汤：用厚朴半斤制，甘草、大黄各三两，枣十枚，大枳实五枚，桂二两，生姜五两，以水一斗，煎取四升。温服八合，日三。呕者，加半夏五合。《金匱要略》。

5. 男女气胀 心闷，饮食不下，冷热相攻，久患不愈。厚朴姜汁炙焦黑，为末。以陈米饮调服二钱匕，日三服。《斗门方》。

6. 反胃止泻 方同上。

7. 中满洞泻 厚朴、干姜等分为末，蜜丸梧子大。每服五十丸，米饮下。《鲍氏方》。

8. 小儿吐泻 胃虚及有痰惊。梓朴散：用梓州厚朴一两，半夏（汤泡七次，姜汁浸半日，晒干）一钱，以米泔三升同浸一百刻，水尽为度，如未尽，少加火熬干。去厚朴，只研半夏。每服半钱或一字，薄荷汤调下。钱乙《小儿直诀》。

9. 霍乱腹痛 厚朴汤：用厚朴炙四两，桂心二两，枳实五枚，生姜二两，水六升，煎取二升，分三服。此陶隐居方也。唐石泉公王方庆《广南方》云：此方不惟治霍乱，凡诸病皆治。圣惠方：用厚朴姜汁炙，研末。新汲水服二钱，如神。

10. 下痢水谷 久不瘥者。厚朴三两，黄连三两，水三升，煎一升，空心细服。《梅师方》。

11. 大肠干结：厚朴生研，猪脏煮捣和丸梧子大。每姜水下三十丸。《十便良方》。

12. 尿浑白浊 心脾不调，肾气浑浊。用厚朴姜汁炙一两，白茯苓一钱，水、酒各一碗，煎一碗，温服。《经验良方》。

13. 月水不通：厚朴三两炙切，水三升，煎一升，分二服，空心饮。不过三四剂，神验。一加桃仁、红花。《梅师方》。

逐折

【主治】疗鼠痿，明目益气。《别录》。

【正误】〔别录有名未用曰〕逐折杀鼠，益气明目。一名百合，一名厚实，生木间，茎黄，七月实，黑如大豆。〔弘景曰〕杜仲子，亦名逐折。《别录》厚朴条下，已言子名逐折；而有名未用中复出逐折，主治相同，惟鼠痿、杀鼠字误，未知孰是尔？所云厚实，乃厚朴实也，故皮谓之厚皮。陶氏不知，援引杜仲为注，皆误矣。今正之。

【附录】浮烂罗勒〔藏器曰〕生康国。皮似厚朴，味酸，平，无毒。主一切风气，开胃补心，除冷痹，调脏腑。

杜仲 《本经》上品

【释名】 思仲《别录》、思仙《本经》、木绵《吴普》、櫛。〔时珍曰〕昔有杜仲服此得道，因以名之。思仲、思仙，皆由此义，其皮中有银丝如绵，故曰木绵。其子名逐折，与厚朴子同名。

【集解】 〔别录曰〕杜仲生上虞山谷及上党、汉中。二月、五月、六月、九月采皮。〔弘景曰〕上虞在豫州，虞、虢之虞，非会稽上虞县也。今用出建平、宜都者。状如厚朴，折之多白丝者为佳。〔保升曰〕生深山大谷，所在有之。树高数丈，叶似辛夷。〔颂曰〕今出商州、成州、峡州近处大山中。叶亦类柘，其皮折之白丝相连。江南谓之櫛。初生嫩叶可食，谓之櫛芽。花、实苦涩，亦堪入药。木可作屐，益脚。

皮

【修治】 〔斆曰〕凡使削去粗皮。每一斤，用酥一两，蜜三两，和涂火炙，以尽为度。细锉用。

【气味】辛，平，无毒。〔别录曰〕甘，温。〔权曰〕苦，暖。〔元素曰〕性温，味辛、甘。气味俱薄，沉而降，阴也。〔杲曰〕阳也，降也。〔好古曰〕肝经气分药也。〔之才曰〕恶玄参、蛇蜕皮。

【主治】腰膝痛，补中益精气，坚筋骨，强志，除阴下痒湿，小便余沥。久服，轻身耐老。《本经》。脚中酸疼，不欲践地。《别录》。治肾

肾冷，?腰痛。人虚而身强直，风也。腰不利，加而用之。《甄权》。能使筋骨相着。《李杲》。润肝燥，补肝经风虚。《好古》。

【发明】〔时珍曰〕杜仲古方只知滋肾，惟王好古言是肝经气分药，润肝燥，补肝虚，发昔人所未发也。盖肝主筋，肾主骨。肾充则骨强，肝充则筋健。屈伸利用，皆属于筋。杜仲色紫而润，味甘微辛，其气温平。甘温难补，微辛能润。故能入肝而补肾，子能令母实也。按庞元英《谈藪》云：一少年新娶，后得脚软病，且疼甚。医作脚气治不效。路铃孙琳诊之。用杜仲一味，寸断片拆，每以一两，用半酒、半水一大盏煎服。三日能行，又三日全愈。琳曰：此乃肾虚，非脚气也。杜仲能治腰膝痛，以酒行之，则为效容易矣。

【附方】旧三，新三。

1. 青娥丸 方见补骨脂下。

2. 肾虚腰痛 崔元亮《海上集验方》：用杜仲去皮炙黄一大斤，分作十剂。每夜取一剂，以水一大升，浸至五更，煎三分减一，取汁，以羊肾三四枚切下，再煮三五沸，如作羹法，和以椒、盐，空腹顿服。《圣惠方》：入薤白七茎。《篋中方》：加五味子半斤。

3. 风冷伤肾 腰背虚痛。杜仲一斤切炒，酒二升，渍十日，日服三合。此陶隐居《得效方》也。《三因方》：为末，每旦以温酒服二钱。

4. 病后虚汗 及目中流汁。杜仲、牡蛎等分，为末。卧时水服五匕，不止更服。《肘后方》。

5. 频惯堕胎 或三四月即坠者。于两月前，以杜仲八两（糯米煎汤浸透，炒去丝），续断二两（酒浸，焙干）为末，以山药五六两，为末作糊，丸梧子大。每服五十丸，空心米饮下。肘后方：用杜仲焙研，枣肉为丸。糯米饮下。杨起《简便方》。

6. 产后诸疾 及胎脏不安。杜仲去皮，瓦上焙干，木臼捣末，煮枣肉和丸弹子大。每服一丸，糯米饮下，日二。《胜金方》。

櫛芽

【气味】缺

【主治】作蔬，去风毒脚气，久积风冷，肠痔下血。亦可煎汤。《苏颂》。

椿樗 《唐本草》

校正：并入《嘉祐》椿荚。

【释名】 香者名椿《集韵》作樗，《夏书》作杗，《左传》作檜。臭者名樗音丑居切。亦作?。山樗名栲音考。虎目树《拾遗》、大眼桐。〔时珍曰〕椿樗易长而多寿考，故有椿、栲之称。《庄子》言“大椿以八千岁为春秋”是矣。椿香而樗臭，故椿字又作樗，其气熏也。?字从瘳，其气臭，人呵瘳之也。樗亦椿音之转尔。〔藏器曰〕俗呼椿为猪椿，北人呼樗为山椿，江东呼为虎目树，亦名虎眼。谓叶脱处有痕，如虎之眼目。又如樗蒲子，故得此名。

【集解】 〔恭曰〕椿、樗二树形相似，但樗木疏、椿木实为别也。〔颂曰〕二木南北皆有之。形干大抵相类，但椿木实则叶香可啖，樗木疏而气臭，膳夫亦能熬去气，并采无时。樗木最为无用，《庄子》所谓“吾有大木，人谓之樗，其本拥肿不中绳墨，小枝曲拳不中规矩”者。《尔雅》云：栲，山樗。郭璞注云：栲似樗，色小白，生山中，因名。亦类漆树。俗语云：樗、樗、栲、漆，相似如一。陆玕《诗疏》云：山樗与田樗无异，叶差狭尔。吴人以叶为茗。〔宗奭曰〕椿、樗皆臭，但一种有花结子，一种无花不实。世以无花而木身大，其干端直者为椿，椿木用叶。其有花、荚而木身小，干多迂矮者为樗，樗用根及荚、叶。又虫部有樗鸡，不言椿鸡，以显有鸡者为樗，无鸡者为椿。古人命名其义甚明。〔禹锡曰〕樗之有花者无荚，有荚者无花。其荚夏月常生臭樗上，未见椿上有荚者。然世俗不辨椿、樗之异，故呼樗荚为椿荚尔。〔时珍曰〕椿、樗、栲，乃一木三种也。椿木皮细肌实而赤，嫩叶香甜可茹。樗木皮粗肌虚而白，其叶臭恶，歉年人或采食。栲木即樗之生山中者，木亦虚大，

梓人亦或用之。然爪之如腐朽，故古人以为不材之木。不似椿木坚实，可入栋梁也。

叶

【**气味**】苦，温，有小毒。〔**洗曰**〕椿芽多食动风，熏十二经脉、五脏六腑，令人神昏血气微。若和猪肉、热面频食则中满，盖拥经络也。

〔**时珍曰**〕椿叶无毒，樗叶有小毒。

【**主治**】煮水，洗疮疥风疽。樗木根、叶尤良。《唐本》。白秃不生发，取椿、桃、楸叶心捣汁，频涂之。《时珍》。嫩芽沦食，消风祛毒。《生生编》。

白皮及根皮

【**修治**】〔**斲曰**〕凡使椿根，不近西头者为上。采出拌生葱蒸半日，锉细，以袋盛挂屋南畔，阴干用。〔**时珍曰**〕椿、樗木皮、根皮，并刮去粗皮，阴干，临时切焙入用。

【**气味**】苦，温，无毒。〔**权曰**〕微热。〔**震亨曰**〕凉而燥。〔**藏器曰**〕樗根有小毒。〔**时珍曰**〕樗根制硫黄、砒石、黄金。

【**主治**】疝??。樗根尤良。《唐本》。去口鼻疝虫，杀蛔虫疥??，鬼注传尸，蛊毒下血，及赤白久痢。《藏器》。得地榆，止疝痢。《萧炳》。止女子血崩，产后血不止，赤带，肠风泻血不住，肠滑泻，缩小便。蜜炙用。《大明》。利溺涩。《雷斲》。治赤白浊，赤白带，湿气下痢，精滑梦遗，燥下湿，去肺胃陈积之痰。《震亨》。

【**发明**】〔**洗曰**〕女子血崩，及产后血不止，月信来多，并赤带下。宜取东引细椿根一大握洗净，以水一大升煮汁，分服便断。小儿疝痢，亦宜多服。仍取白皮一握，粳米五十粒，葱白一握，炙甘草三寸，豉两合，水一升，煮半升，以意服之。枝叶功用皆同。〔**震亨曰**〕椿根白皮，性凉而能涩血。凡湿热为病，泻痢浊带，精滑梦遗诸证，无不用之，有燥下湿及去肺胃陈痰之功。治泄泻，有除湿实肠之力。但痢疾滞气未尽者，不可遽用。宜入丸散，亦可煎服，不见有害。予每用炒研糊丸，看病作汤

使，名固肠丸也。〔时珍曰〕椿皮色赤而香，檗皮色白而臭，多服微利人。盖椿皮入血分而性涩，檗皮入气分而性利，不可不辨。其主治之功虽同，而涩利之效则异，正如茯苓、芍药，赤、白颇殊也。凡血分受病不足者，宜用椿皮；气分受病有郁者，宜用檗皮，此心得之微也。《乾坤生意》治疮肿下药，用檗皮以无根水研汁，服二三碗，取利数行，是其验矣。故陈藏器言檗皮有小毒，盖有所试也。〔宗奭曰〕洛阳一女人，年四十六七，耽饮无度，多食鱼蟹，畜毒在脏，日夜二三十泻，大便与脓血杂下，大肠连肛门痛不堪任。医以止血痢药不效，又以肠风药则益甚，盖肠风则有血无脓。如此半年余，气血渐弱，食减肌瘦。服热药则腹愈痛，血愈下；服冷药即注泄食减，服温平药则病不知。如此期年，垂命待尽。或人教服人参散，一服知，二服减，三服脓血皆定，遂常服之而愈。其方治大肠风虚，饮酒过度，挟热下痢脓血痛甚，多日不瘥。用檗根白皮一两，人参一两，为末。每服二钱，空心温酒调服，米饮亦可。忌油腻、湿面、青菜、果子、甜物、鸡、猪、鱼、羊、蒜、薤等。

【附方】旧六，新十。

1. 去鬼气：檗根一握细切，以童儿小便二升，豉一合，浸一宿，绞汁煎一沸。三五日一度，服之。陈藏器《本草》。
2. 小儿疳疾：椿白皮日干二两为末，以粟米淘净研浓汁和丸梧子大。十岁三四丸，米饮下，量人加减。仍以一丸纳竹筒中，吹入鼻内，三度良。《子母秘录》。
3. 小儿疳痢困重者。用檗白皮捣粉，以水和枣作大馄饨子。日晒少时，又捣，如此三遍，以水煮熟，空肚吞七枚。重者不过七服。忌油腻、热面、毒物。又方：用檗根浓汁一蚬壳，和粟米泔等分，灌下部。再度即瘥，其验如神。大人亦宜。《外台秘要》。
4. 休息痢疾日夜无度，腥臭不可近，脐腹撮痛。东垣《脾胃论》：用椿根白皮、诃黎勒各半两，母丁香三十个，为末，醋糊丸梧子大。每服五十丸，米饮下。唐瑶《经验方》：用椿根白皮东南行者，长流水

内漂三日，去黄皮，焙为末。每一两加木香二钱，粳米饭为丸。每服一钱二分，空腹米饮下。

5. 水谷下利 及每至立秋前后即患痢，兼腰痛。取樗根一大两捣筛，以好面捻作馄饨如皂子大，水煮熟。每日空心服十枚。并无禁忌，神良。刘禹锡《传信方》。

6. 下利清血 腹中刺痛。椿根白皮洗刮晒研，醋糊丸梧子大。每空心米饮下三四十丸。一加苍术、枳壳减半。《经验方》。

7. 脏毒下痢 赤白。用香椿洗刮取皮，日干为末。饮下一钱，立效。《经验方》。

8. 脏毒下血 温白丸：用椿根白皮去粗皮，酒浸晒研，枣肉和丸梧子大。每淡酒服五十丸。或酒糊丸亦可。《儒门事亲》。

9. 下血经年：樗根三钱，水一盞，煎七分，入酒半盞服。或作丸服。虚者，加人参等分。即虎眼树。《仁存方》。

10. 血痢下血 腊月，日未出时，取背阴地北引樗根皮，东流水洗净，挂风处阴干为末。每二两入寒食面一两，新汲水丸梧子大，阴干。每服三十丸，水煮滚，倾出，温水送下。忌见日，则无效。名如神丸。《普济方》。

11. 脾毒肠风 因营卫虚弱，风气袭之，热气乘之，血渗肠间，故大便下血。用臭椿根刮去粗皮焙干四两，苍术米泔浸焙、枳壳麸炒各一两，为末，醋糊丸如梧子大。每服五十丸，米饮下，日三服。《本事方》。

12. 产后肠脱 不能收拾者。樗枝取皮焙干一握，水五升，连根葱五茎，汉椒一撮，同煎至三升，去滓倾盆内。乘热熏洗（冷则再热，一服可作五次用），洗后睡少时。忌盐酢、酱面、发风毒物，及用心劳力等事。年深者亦治之。《妇人良方》。

13. 女人白带：椿根白皮、滑石等分，为末，粥丸梧子大。每空腹白汤下一百丸。又方：椿根白皮一两半，干姜炒黑、白芍药炒黑、黄柏炒黑各二钱，为末。如上法丸服。《丹溪方》。

14. 男子白浊 方同上。

荚

【释名】 凤眼草 《象形》。

【主治】 大便下血。《嘉祐》。

【附方】 新三。

1. 肠风泻血：椿荚半生半烧，为末。每服二钱，米饮下。《普济方》。

2. 误吞鱼刺 《生生编》：用椿树子烧研，酒服二钱。《保寿堂方》：用香椿树子阴干半碗，搗碎，热酒冲服，良久连骨吐出。

3. 洗头明目：用凤眼草（即椿树上丛生荚也），烧灰淋水洗头，经一年，眼如童子。加椿皮灰，尤佳。正月七日、二月八日、三月四日、四月五日、五月二日、六月四日、七月七日、八月三日、九月二十日、十月二十三日、十一月二十九日、十二月十四日洗之。《卫生易简方》。

漆 《本经》上品

【释名】 漆〔时珍曰〕许慎《说文》云：漆本作𣎵，木汁可以髹物，其字象水滴而下之形也。

【集解】 〔别录曰〕干漆生汉中山谷。夏至后采，干之。〔弘景曰〕今梁州漆最甚，益州亦有。广州漆性急易燥。其诸处漆桶中自然干者，状如蜂房孔孔隔者为佳。〔保升曰〕漆树高二三丈余，皮白，叶似椿，花似槐，其子似牛李子，木心黄。六月、七月刻取滋汁。金州者最善。漆性并急，凡取时须荏油解破，故淳者难得，可重重别制拭之。上等清漆，色黑如璧，若铁石者好。黄嫩若蜂巢者不佳。〔颂曰〕今蜀、汉、金、峡、襄、歙州皆有之。以竹筒钉入木中，取汁。崔豹《古今注》云：以刚斧斫其皮开，以竹管承之，滴汁则成漆也。〔宗奭曰〕湿漆药中未见，用者皆干漆尔。其湿者，在燥热及霜冷时则难干；得阴湿，虽寒月亦易干，亦物之性也。若沾渍人，以油治之。凡验漆，惟稀者以物蘸起，细而不断，断而急收，更又涂于干竹上，荫之速干者，并佳。〔时珍曰〕

漆树人多种之，春分前移栽易成，有利。其身如柿，其叶如椿。以金州者为佳，故世称金漆，人多以物乱之。试诀有云：微扇光如镜，悬丝急似钩。撼成琥珀色，打着有浮沔。今广浙中出一种漆树，似小榎而大。六月取汁漆物，黄泽如金，即《唐书》所谓黄漆者也。入药仍当用黑漆。广南漆作饴糖气，沾沾无力。

### 干漆

**【修治】**〔大明曰〕干漆入药，须捣碎炒熟。不尔，损人肠胃。若是湿漆，煎干更好。亦有烧存性者。

**【气味】**辛，温，无毒。〔权曰〕辛、咸。〔宗奭曰〕苦。〔元素曰〕辛，平，有毒。降也，阳中阴也。〔之才曰〕半夏为之使。畏鸡子，忌油脂。〔弘景曰〕生漆毒烈，人以鸡子和，服之去虫，犹自啮肠胃也。畏漆人乃致死者。外气亦能使身肉疮肿，自有疗法。〔大明曰〕毒发，饮铁浆、并黄栌汁、甘豆汤，吃蟹，并可制之。〔时珍曰〕今人货漆多杂桐油，故多毒。《淮南子》云：蟹见漆而不干。《相感志》云：漆得蟹而成水。盖物性相制也。凡人畏漆者，嚼蜀椒涂口鼻则可免。生漆疮者，杉木汤、紫苏汤、漆姑草汤、蟹汤浴之，皆良。

**【主治】**绝伤，补中，续筋骨，填髓脑，安五脏，五缓六急，风寒湿痹。生漆：去长虫。久服，轻身耐老。《本经》。干漆：疗咳嗽，消瘀血痞结腰痛，女人疝瘕，利小肠，去蛔虫。《别录》。杀三虫，主女人经脉不通。《甄权》。治传尸劳，除风。《大明》。削年深坚结之积滞，破日久凝结之瘀血。《元素》。

**【发明】**〔弘景曰〕仙方用蟹消漆为水，炼服长生。《抱朴子》云：淳漆不粘者，服之通神长生。或以大蟹投其中，或以云母水，或以玉水合之服，九虫悉下，恶血从鼻出。服至一年，六甲、行厨至也。〔震亨曰〕漆属金，有水与火，性急而飞补。用为去积滞之药，中节则积滞去后，补性内行，人不知也。〔时珍曰〕漆性毒而杀虫，降而行血。所主诸证虽繁，其功只在二者而已。

【附方】旧四，新七。

1. 小儿虫病 胃寒危恶证与痢相似者。干漆捣烧烟尽、白芨萸等分，为末。米饮服一字至一钱。《杜壬方》。

2. 九种心痛 及腹胁积聚滞气。筒内干漆一两，捣炒烟尽，研末，醋煮面糊丸梧子大。每服五丸至九丸，热酒下。《简要济众》。

3. 女人血气 妇人不曾生长，血气疼痛不可忍，及治丈夫疝气、小肠气撮痛者，并宜服二圣丸。湿漆一两，熬一食顷，入干漆末一两，和丸梧子大。每服三四丸，温酒下。怕漆人不可服。《经验方》。

4. 女人经闭 《指南方》万应丸：治女人月经瘀闭不来，绕脐寒疝痛彻，及产后血气不调，诸癥瘕等病。用干漆一两，打碎，炒烟尽，牛膝末一两，以生地黄汁一升，入银、石器中慢熬，俟可丸，丸如梧子大。每服一丸，加至三五丸，酒、饮任下，以通为度。《产宝方》：治女人月经不利，血气上攻，欲呕，不得睡。用当归四钱，干漆三钱，炒烟尽，为末，炼蜜丸梧子大。每服十五丸，空心温酒下。《千金》：治女人月水不通，脐下坚如杯，时发热往来，下痢羸瘦，此为血瘕。若生肉症，不可治也。干漆一斤烧研，生地黄二十斤取汁和，煎至可丸，丸梧子大。每服三丸，空心酒下。

5. 产后青肿 疼痛，及血气水疾。干漆、大麦芽等分，为末，新瓦罐相间铺满，盐泥固济，煅赤，放冷研散。每服一二钱，热酒下。但是产后诸疾皆可服。《妇人经验方》。

6. 五劳七伤 补益方：用干漆、柏子仁、山茱萸、酸枣仁各等分，为末，蜜丸梧子大。每服二七丸，温酒下，日二服。《千金方》。

7. 喉痹欲绝 不可针药者。干漆烧烟，以筒吸之。《圣济总录》。

8. 解中蛊毒：平胃散末，以生漆和，丸梧子大。每空心温酒下七十丸至百丸。《直指方》。

9. 下部生疮：生漆涂之良。《肘后方》。

漆叶

以上内容仅为本文档的试下载部分，为可阅读页数的一半内容。如要下载或阅读全文，请访问：<https://d.book118.com/565344241134011340>